

太上老君說常清靜經註（一）

老君曰：大道無形，生育天地；大道無情，運行日月；大道無名，長養萬物。吾不知其名，強名曰道。

纔言可道即非常道。既不可道何以名道嘍？只這道之一字，已道了也。視之不足見，聽之不足聞，搏之不可得，用之不可既。惟惚惟恍不屬聲聞，曰希曰夷無有定體。若作聲聞會不足以成，若作定體求不足以應變。道雖無形，因天地生育其形可見；道雖無情，推日月運行其情可察；道雖無名，窮萬物長養其名可立。《易繫》云：「在天成象，在地成形，變化見矣。」非道之形乎？又曰：「鼓之以雷霆，潤之以風雨，日月運行，一寒一暑。」非道之情乎？又曰：「乾道成男，坤道成女。」非道之名乎？道本無名，聖人強立名道者，通天下萬變，歸天下之殊途，坦平蕪直、大路之謂也。

老君曰：大道無形

無形者，陽淵渺邈，曠大無窮，頤心同體，微妙無方。故言大道無形矣。

頌曰：大道本無形，無形亦假名。視之非有物，審聽絕音聲。覺性通幽靜，頤神透目清。太空無伴侶，孤月照蓬瀛。

生育天地

天地有形象，皆因大道育養之，故曰生育天地矣。

頌曰：一炁生天地，三光在彼中。四時分造化，萬物得和融。欲了無生法，知心物外窮。至真明不盡，常與道之通。

大道無情

道無情者，湛然非象，虛極無心，萬物生成，無為自化。故曰大道無情矣。

頌曰：無情通大道，育養本無情。掌握乾坤秀，包容天地明。上穿金闕界，下徹九幽冥。蕩蕩無窮測，玄玄覆玉京。

運行日月

日月者，道化玄明，人神之主，運行四通，普照而不昧也。

頌曰：大道澄空廓，天邊日月長。運行周匝界，昇入遍他方。現出靈華潔，迴還一體光。達人知此意，咫尺是仙鄉。

大道無名

無名者大道，通玄微妙，至理無窮，混元一炁，先天地而生，本無名也。

頌曰：道化虛空體，權為假立名。有名非有相，無物亦無形。上徹三天瑩，橫擔四海明。闡開清靜眼，飛躍似流星。

長養萬物

道大無形，湛然不動，皓皓純一，覆藏天地，運行日月，流轉江河，掌握山川，包含谿谷，滋溢園林，成熟五穀，結秀花果。一切萬物皆稟道炁而所生，本自無為，感時而自化。道本無形，育於有象。故曰長養萬物矣。

頌曰：道化芸芸長，機生物自遷。煙嵐光萬頃，鬱秀照千山。淙野連溪壑，清音對碧天。悟茲真福地，此處隱飛仙。

吾不知其名

太上言，我不知道之名，為獨處無礙，太真玄妙之機，無生無滅，無增無減，隱顯無方。眾生不悟，太上垂慈，假立有名矣。

頌曰：妙道迷難悟，心開慧自靈。元神生固蒂，虛谷證圓明。海藏凝珠璨，山頭混日精。滿天昕寶鑑，光照玉京城。

強名曰道

道本無名。既以有名，著於物相；若以無心，死入落空。有無相生，杳冥相對。應物現形，日用不離。難分正教之法，強名曰道矣。

頌曰：道本無言說，強名分辨別。心清秀炁凝，性靜靈雲結。海上起新風，天邊生古月。沖虛物我明，萬象齊俱攝。

文獻出處

【金】侯善淵，《太上老君說常清靜經註》，收錄於《正統道藏》，第二十八冊，台北：新文豐出版公司，1977年，頁808-818。

【元】李道純，《太上老君說常清靜經註》，收錄於《正統道藏》，第二十八冊，台北：新文豐出版公司，1977年，頁755-758。